

KERATAN AKHBAR

JUDUL : Utusan Malaysia

TARIKH : Jumaat, 30 September 2016



Kerjasama institusi Kesultanan Melayu penting

30 September 2016 12:08 AM



TUANKU SYED FAIZUDDIN PUTRA JAMALULLAIL diiringi Azlan Man (kanan) dan Nafisah Ahmad melawat pameran koleksi dokumen sempena Seminar Institusi Raja (Siraj) IV anjuran Unimap di Perpustakaan Negara, Kuala Lumpur, semalam. BERNAMA

KUALA LUMPUR 29 Sept. – Hubungan luar dan kerjasama antara institusi beraja Kesultanan Melayu dengan kerajaan negara asing masih memainkan peranan

penting dalam mengukuhkan keselamatan dan benteng pertahanan negara, selain dapat meningkatkan pertumbuhan ekonomi dan evolusi pendidikan.

Raja Muda Perlis, Tuanku Syed Faizuddin Putra Jamalullail bertitah, fungsi dan kuasa Kesultanan Melayu pada masa ini boleh diterjemahkan kepada satu bentuk hubungan akrab dan kerjasama dengan negara-negara luar yang akan memberikan kelebihan dalam beberapa faktor tersebut.

“Benteng pertahanan negara dapat diperkukuhkan dengan kerjasama, latihan, perkongsian maklumat risikan dan perolehan peralatan serta keperluan ketenteraan, selain peningkatan tahap keselamatan melalui strategi komprehensif dan bersepadu dalam menangani keganasan, imigrasi, penyeludupan dan aliran tenaga buruh asing.

“Pertumbuhan ekonomi juga akan lebih rancak dengan kemasukan pelaburan asing, peluang mendapatkan sumber dengan harga lebih kompetitif, peningkatan jumlah kehadiran dan penjanaan peluang pekerjaan manakala evolusi pendidikan dapat dicapai hasil pemindahan teknologi, selain peluang melanjutkan pelajaran ke luar negara yang mampu melahirkan rakyat lebih progresif dan kompeten,” titah baginda.

Baginda bertitah demikian ketika berangkat merasmikan Seminar Institusi Raja (Siraj) IV anjuran Universiti Malaysia Perlis (Unimap) di Perpustakaan Negara di sini hari ini.

Yang turut hadir, Menteri Besar Perlis, Datuk Seri Azlan Man; Naib Canselor Unimap, Prof. Datuk Dr. Zul Azhar Zahid Jamal dan Ketua Pengarah Perpustakaan Negara, Nafisah Ahmad.

Baginda bertitah, idea dan inisiatif penganjuran seminar tersebut sejak 2013 merupakan wadah tepat dalam usaha mendaulatkan institusi raja.

“Besarlah harapan saya agar semua pembentangan kertas kerja menerusi platform ini dapat dijadikan asas ke arah pemerkasaan ilmu, pengembangan minda serta ketertiban tindakan dan keputusan,” titah baginda.

Baginda turut melahirkan harapan agar seminar tersebut terus diadakan pada masa hadapan supaya memberikan manfaat yang besar dalam memelihara dan memperkukuhkan hubungan antara rakyat dan institusi raja.